

29.april 2008

UPA 08/44

**Inatsisartut peqqussutaata kiassarnermi erngup nukissiorfiata Utoqqarmiut  
Kangerluarsunnguaniittup pilersuiffiani kiassaateqarfinnut innaallagissamit kiassarneqartunut  
(elektrokedler) attavilersinnissamik pisussaanermut tunngasup allannguuteqartinnera pillugu  
Inatsisartut peqqussutissaattut siunnersuut**

**pillugu**

**Inatsisartut Ineqarnermut Attaveqarnermullu Ataatsimiititaliaata**

**ISUMALIUTISSISSUTAA**

**Inatsisartut peqqussutissaattut siunnersuutip aappassaaneerpeqarnerani saqqummiunneqartoq  
(Ineqarnermut, Attaveqarnermut Aatsitassanullu Naalakkersuisoq)**

Inatsisartut Attaveqarnermut Ineqarnermullu Ataatsimiititaliaat kingullermik suliarinninnermini ukuninnga inuttaqarpoq:

Inatsisartunut ilasortaq Godmand Rasmussen, Atassut, siulittaasoq  
Inatsisartunut ilasortaq Jørgen Wæver Johansen, Siumut, siulittaasup tullia  
Inatsisartunut ilasortaq Marie Fleischer, Demokraatit  
Inatsisartunut ilasortaq Johnathan Motzfeldt, Siumut  
Inatsisartunut ilasortaq Esmar Bergstrøm Inuit Ataqtigiit

Siullermeerinerup kingorna Inatsisartut Attaveqarnermut Ineqarnermullu Ataatsimiititaliaata Inatsisartut peqqussutaat nassuiaatitaalu misissorpai.

**Siunnersuutip imaa.**

Qorlortorsuarimi erngup nukinganik innaallagissiorfiup nutaap pilersuiffiani sullitat, pisortaagunik namminersortuugunilluunniit, erngup nukinganik innaallagissiorfimmit innaallagialuq atorlugu kiassarnissamut pisussaaffilerneqarnissaannut Inatsisartut peqqussutissaattut siunnersuutikkut Nukissiorfiit periarfissinneqarput. Taamatut piginnaatitsissut Sisimiuni erngup nukinganik innaallagissiorfimmu maanna sananeqartumut aammalu Ilulissani erngup nukinganik innaallagissiorfiliassatut pilersaarutigineqartumut aamma atuuttussanngortinneqalersaarpoq.

**Tusarniaaneq**

Siunnersuut oqartussaasunut kattuffinnullu ukununnga tusarniaassutigineqarpoq: Ineqarnermut Attaveqarnermullu Pisorta qarfik, Aningaasaqarnermut Pisorta qarfik, Nukissiorfiit, KNI Energi A/S, Kanukoka aamma Greenland Development A/S. KANUKOKA Aningaasaqarnermullu Pisorta qarfik tusarniaanermut akissuteqarput. Naalakkersuisut amerlanerusunut tusarniaasimappata pitsaasimassagaluartoq ataatsimiititaliaq isumaqarpoq, tassunga ilanngullugu assersuutigalugu Kalaallit Nunaanni Sulisitsisut Peqatigiiffiannut, taassumami ilaasortai arlallit nukimmik annertuumik atuiffiusumik tunisassioruummata, matumani immikkut eqqarsaatigineqarluni aalisakkanik tunisassiorneq. Tamatuma saniatigut ataatsimiititaliaq allanik oqaaseqaatissaqanngilaq.

## Ataatsimiititaliap siunnersuummik suliarinninnera

Ataatsimiititaliap aallarniutigalugu oqaatigissavaa inatsisitigut maanna inissisimanermut sanilliullugu atortutigut annertunerusumik allannguinerimik peqqussutissatut siunnersuut kinguneqassanngimmat, inatsisitigulli inissisimaneq tamanna sumiiffinnut erngup nukinganik innaallagissiorfinnik nutaanik sanaartorfiusunut atuuttussanngortinneqarluni. Tamatumani Qorlortorsuarimi innaallagissiorfiup aammalu Ilulissani Sisimiunilu erngup nukinganik innaallagissiorfissat tunisassiaasa sinneruttup sapinngisamik atorluarneqarlunilu inuiaqatigiinnit annertunerpaamik iluanaarutigineqarnissaa siunertarineqarluni. Naalakkersuisut nalinginnaasumik nassuiaatini imatut oqaaseqarnerat ataatsimiititaliamit maluginiarneqarpoq:

*Aningaasaqarnermut Pisortaqarfimmit tusarniaanermut akissut makkuninnga pissutissaqalersitsivoq:*

*Tusarniaaffigineqartup maluginiaqquvaa siunissaq ungasinnerusooq eqqarsaatigalugu akiliutissatut aalajangersakkani takuneqarsinnaasumik imaluunniit allatut sunniuttumik innuttaasunut aamma inuussutissarsiornermut aningaasaqarnikkut pitsaasumik sunniuteqartussaassasoq.*

Taama tunngaviummik isumaqarneq ataatsimiititaliamit taparserneqarsinnaavoq, tassungalu atatillugu siunissaq ungasinnerusooq isigalugu aningaasaqarnikkut iluanaarutit innaallagissamik pisisunut iluaqutissanngortinneqarnissaat Naalakkersuisooqarfiup Nukissiorfiit suleqatigalugit qanoq suliniutigilersaarneraa pillugu oqaaseqaammik siunnersuutip matumani pineqartup aappassaaneerneqarnerani saqqummiusseqqullugu Naalakkersuisunut ilaasortaq qinnuigineqarpoq. Tassami taamatut siunertaqarneq nassuiaatini immikkut ersersinniarneqarsimasutut isumaqarfiginanngimmat. Siunnerfittut aalajangiunneqartoq siunissaq ungasinnerusooq isigalugu ikummatissanik nunap iluaneersunik atuinermik annikillisaaqataassasoq Co´2-millu aniatitatta appartinneqarnissaanik qulakkeerinnissasoq Naalakkersuisut assigalugit ataatsimiititaliaq isumaqarpoq. Aammattaaq attavilersinnissamik pisussaaneq innuttaasunut anigaasartuutaassanngimmat ataatsimiititaliap nuanaarutigaa, tassami innaallagissiorfimmut attaviliinerimi aningaasartuutit Nukissiorfiup kisimi nammassammagit. Ataatsimut isigalugu siunnersuutikkut anguniarneqartut siunniussallu ataatsimiititaliami partiit sinniisaannit tamanit taparserneqarput.

Peqqussutissatut siunnersuutip suliarineqarnera Atassummit Inuit Ataqtigiinniillu ilaasortaataat immikkut oqaaseqaateqarnissaannut tunngavissaqalersitsivoq.

Assersuutigalugu nunalerinerimik ingerlataqartut erngup nukinganik innaallagissiorfeeqqat aqutigalugit innaallagissamik, imermik kiammillu imminnut tamakkiisumik pilersorsinnaanissaasa suli siuarsarneqarnissaannik ammaassisunik peqqussutip aalajangersakkanik ilaqartinneqarnissaa isumaliutigineqarsimasinnaagaluartoq Atassutip ilaasortaataata oqaatigissallugu tunngavissaqarsoraa. Aammattaaq inuussutissarsiummik ingerlataqartut imminut pilersornissamik kissaateqarnertik oqaatigisimagaat Atassummit ilisimaneqarpoq, peqqussutissatullu siunnersuutip nutarterneqarnera sioqqullugu suliami apeqquut taanna ilanngunneqarsimasorinangilaq. Atassummit ilaasortaataat tamanna ajuusaarnartuutippaa.

Inuit Ataqtigiit ilaasortaataat isumaqarpoq Nukissiorfiit aktiaateqarluni ingerlatseqatigiiffinngortinneqassappata ingerlatseqatigiiffiup neqeroorutaanik tamakkiisumik ilaannakortumilluunniit atuerusunnerlutik atuerusunngilluinnarnerlutilluunniit innuttaasut suliffeqarfiillu aalajangernissaminut periarfissinneqarnissaat qulakkeerneqartariaqartoq. Unammilleqatigiinnermut inatsit naapertorlugu aktiaateqarluni ingerlatseqatigiiffiit allanut atugassaritaasunik atugassaqarlutik unammillertussaapput, aammalu niuernerimi siuttuugaluarunilluunniit suliffeqarfinnit mikinernit akikinnerusumik neqerooruteqarnissaminut siuttutut inissisimanerminnik atonerlueqqusaanngillat.

Aalajangersakkamik innuttaasut nukissiutinik allanik atuisinnaanerannik periarfissiisumik ilanngussisoqartariaqartoq Inuit Ataqtigiit ilaasortaataat aamma isumaqarpoq. Taakku tassaasinnaapput seqernup kissarneranik tigooraaviit imermik uunnaanermut imaluunniit silaannarmik kissartumik illup iluanut supoorinnermut atorneqarsinnaasut nukissiutilluunniit allat. Tamanna pillugu siunnersuutip aappassaaneerneqarnissaanut allannguutissatut siunnersuummik saqqummiusseqqullugit Naalakkersuisut ilaasortaataatimik kaammattorneqarput.

## **Ataatsimiititaliap inassuteqaataa**

### **Siuliani allassimasutut paasinnilluni siunnersuut akuersissutigineqassasoq ataatsimiititaliap isumaqatigiittup inassutigaa.**

Taama oqaaseqarluni Inatsisartut Attaveqarnermut Ineqarnermullu Ataatsimiititaliaata peqqussutissatut siunnersuut Inatsisartunut aappassaaniigassanngortippaa.

Godmand Rasmussen  
Siulittaasoq

Jørgen Wæver Johansen  
Siulittaasup tullia

Marie Fleischer

Jonathan Motzfeldt

Esmar Bergstrøm